



Châng thlan: 2 Korin 9:6, 7.

Zirlâite tân:

Hriat tûr: Lâwm avânga thinlung luang liam leh thil pêk pêkna hi a inzawm dân an hria ang.

Vei tûr: Pathian khawngaihna thûkzia leh a hlûtzia hrethiamin, chhân lêt vê an châk êm êm ang.

Tih tûr: Thilpêk pêk dân kawngte an zawng ang.

THUPI TËHEN:

I. Hriat tûr: Thinlung ațanga pêk

- A. Kan sum leh pài hman dân hian eng tin nge kan ngaih pawimawh zâwng a tihlan?
- B. Kan thil neih ța ber berte hi eng thilten nge pe chhuak tûrin mi tiphûr thîn?
- C. Pathianin kan thil pêk hi eng tin nge a lo teh?

II. Vei tûr: Thinlung a taka a tawn chu

- A. Lâwm taka petu leh dân ang mai emaw, ui tak chung emawa petu danglamna Paulan a sawi chu eng nge ni?
- B. Kan uikawmna thinlung hi tithî a, thil phalna rilru zâwk hi kan châwm len zêl theih nân eng tin nge kan tih ang?
- B. Lâwm taka petu hnêna lâwmna thinlung hi eng tin nge kan piantûr theih ang?

III. Tih tûr: Lâwm taka pên

- A. Lâwm tak chung a pêk hian eng tiangin nge lâwm leh zual chung a pe zêl tûrin mi a siam t̄hin le?

B. Lâwmnaa khat thinlung nei lo hian eng vângin nge lâwm taka pêk a theih miah loh?

C. Phal taka chi tuh theihna tûr rahbi ðhenkhat Paulan a sawi chu engte nge ni?

KHÂIKHÂWMNA: Pathian chuan phal taka petûte hi a lâwm a. Chutiang rilru puthmang chuan Pathianin a fâte hnêna malsâwmna tam tak a vûrte avânga lâwmna a nei chhunzawm reng a ni tih a lantîr a ni.

INZIRTÎR DÂN TÛR

RAHBI 1-NA—Chawk phûr rawh

Bible châng thlûr bing tûr: *2 Korin 9:6, 7.*

Thlarau ðhanna atâna thu pawimawh: Mi dangte hnêna kan thil neihte pêk chhuah hi a bulţantu, a chîng chhuaktu tak chu Pathian a ni a. Chuvâng chuan mihringten min Siamtu, min Tlantu leh kan ðhian ni bawk Pathian nêna lâwmna sâng ber kan chan dun theihna chu kan thil neihte mi dang hnêna kan pêkna hi a ni.

ZIRTÎRTÛTE PUÂL: Pathian chuan lâwm taka petûte hi a lâwm a ni tih chu a chian viâu tho rualin, lâwm taka petûte pawh hian Pathian chu an hmangaih (lâwm) lêt vê tho bawk tih pawh hi a Chiang hlê bawk. Chutianga inhmangaih tawwna, inlawm tawwna chuan thil phalna thinlung a rawn chawk tho ðhîn a. Mi dangte hnêna thil pe vê ngâi lote leh ui tak chung a pe ðhînte chuan hetiang a inlawm tawwna hi an chang vê thei lo; chuvângin an tân chuan mi dangte hnên thil pêk chu thlarau lama thil thar han dâina ni lovin, thil hahthlak leh nimawm tak a ni zâwk ðhîn. Hé “hmangaihna thinlung” pawimawhzia hi kan sawi uar lutuk thei lo hial ang, a chhan pawh hmangaihna a hrin lâwmna chuan uikawmna rilru leh thilphalna rilru inkârah dâidanna bang a siam tlat vâng a ni.

A sawi hawn nân: A hnuai a thumal târ chhuahte hi ngun takin ngaihtuah la. I class member-te kha hêng thumalte hi phal taka

petu hnênah emaw, ui tak chung a petu hnênah emaw, an inhme h dân ang zêla bel tûrin hrilh ang che. Chutiang thumal chu eng vâng a chu mi hnênah chuan bel nge a nih tih sawifiah zêl tûrin i sâwm bawk ang a. Anmahni pawh kha eng ang rilru nge put vê an duh tih i zâwt bawk dâwn nia.

Thumal/tawngkam hrang hrangte: thil danglam deuh tawn châk mi; thil inthlâk thut thut duh lo mi; mi phûr thei tak; mi fimkhur; mi ngui, nguai thei ve tak; mahni inthununna nei lo tak; mi dangte ngaithei lo tak; a tâwk chauha thil ti thîn mi m a h n i rilru puak chhuak vê rênga thil ti thîn; mi thilphal tak; a êng zâwng a thil thlîr mi; mi chapo tak; mahni inla hrang mi; rilru na hmâ tak; thil hlauhawm tak tih châk mi; mi rinawm; mi dangte hrethiam mi; mahni chan tâwka lungâwi thei; thil nghâk peih lo mi; duhthusâm sâm chîng; mahni chauha awm duh; mi zahawm tak; mi rilru zâu; mi dangte ringhlel reng mi

RAHBI 2-NA—Zawng chhuak rawh

ZIRTÎRTÛTE PUÂL: I zirlâite kha Pathian Lehkhabu hian sâwma pakhat leh thawhlawm danglamna a sawi a ni tih hrethiam tûrin hrilh la. A pahnih hian pêk vê vê tûr a nih tho rualin, danglamna langsâr tak tak erawh a awm a ni tih hre bawk rawh se.

ZIR ZÂUNA

I. Sâwma pakhat leh thawhlâwmte (*Luka 2:21–24; Leviticus 12:1–8; 2 Lalte 12:4, 5*).

Sâwma pakhat chu, a hming ang chia hian kan thawh chhuah hmun sâwma thêna hmun khat a ni a. Thawhlâwm/thilhlân erawh chu bituk zât a awm vê chuang lo. Hmânlâi Israel mîte zîngah pawh khân a neining deuh te chuan thawhlâwm an thawh tam tlângpui mai thîn. Krista nausên lâia a nû leh pâten an tih dân kha entîrna tha tak a ni âwm e. *Luka 2:21–24* chuan Mari'n Krista pian hnua inthenna a neih thu kan hmû a. Chutianga inthen

nâna thawhlâwm an thawh ðhin tângpui chu berâmno a ni a (*Lev. 12:1–8*); mahse mi rethei deuh, berâmno nei zo vê lote tân chuan ngaihnhathiamna (âwltîrna ni lovin) a awm tho thung. Mari'n ðhûro no a hlan hian a rethei a ni tih a tilang âwm e.

Sâwma pakhat chu mi zawng zawngin a pêk ðeuh tûr a ni a. Chutih lâiin thawhlâwm erawh chu a petu-in a sum lâk luh aţanga a phal zât a pe mai ðhin—mi hausa deuhin an thawh tam deuh a, mi rethei deuh chuan an thawh tlêm vê leh deuh mai ðhin tângpui bawk. A hmanna thû-ah pawh sâwma pakhat leh thawhlâwm hi a inang lo leh bawk a. Sâwma pakhat chu hmânlâi Israel mîte sâkhaw rawngbâwltu puithiamte leh Levia chî-te châwmna atân hman a ni ðhin a.

Thawhlâwm pawh hi puithiamte mamawh phuhrûk nân pawh hman vê theih tho chu ni mah se, Pathian biak in (temple) thawm ðhat leh chei mâwi nân chuan sâwma pakhat ni lo thawhlâwm bîk an la ðhin a ni (*2 Lalte 12:4, 5*). Sual thâwina atâna thilhlân/thawhlâwm an rawn thawhte chu puithiamte chanpual bîk a nih lâiin, lâwmna thilpêk an rawn thawhte erawh chu a petu chhîngte bâkah, ram dang mîte, fahrahte leh hmeithâite pawhin an ei vê thei thung; hêng mîte hi mi rethei ber ber nia ngaih an ni sî a (*Deut. 16:11–14*). Hei bâkah hian, Thuthlung Thar lamah chuan Korin khuaa ringtûte chu an Kristianpui mi rethei tak takte tâna thawhlâwm an thawh khâwm avânga fak an ni bawk a ni.

Sawi ho tûr: Bible-in sâwma pakhat leh thawhlâwm danglamna a sawi chu sawifah la. Eng vângin nge a pahnih hian Pathian hnêna pe vê vê tûra beisei kan nih le?

II. Rimtui bâwm chu (*Luka 7:37–47; 8:2; Exodus 34:26; Leviticus 22:19–24; Number 18:29*).

Pathian chu mahni hma sial lo tawp a nihna hian mihringte thilphalna a chawh tho va. Chutianga mihringte thinlunga

thilphalna chawh thawh a nih dân chu Simona ina Isuan chaw a ei zâna Mari thil tih khân mâwi takin a târlang lang.

“Chhandamtu chu phâr hri tenawm tak vei a tihdam tâk Simona bulah a thû a, a sîr leh lamah chuan thlân ata a kaihthawh Lazara a thû vê bawk a. Marthi chuan anni chu a vil reng a; chutih lâiin Mari erawh chu Isua kamchhuak tin ngâithlain a awm thung. Mari chungah chuan zahngaihna lantîrin Isuan a sualte a ngaihamsak tawh a, thlân aţangin a nuţa Lazara a kâitho tawh bawk—hêngte avâng hian Mari thinlung chu lâwmnain a khat a ni. Isuan a thih thuai tûr thu a sawite chu Mari chuan a lo hre reng a, Isua a hmangaihna thûk tak leh a thih thuai dâwn avânga a lungngaihna kal kawp tlat nêna amah a chawimawi theih hun tûr chu a lo thîr reng a ni. Neih thinglung khâwngin ‘alabasta bâwma hriak rimmtui man to tak’ chu Isua taksaa hnawih atân a lo lei lâwk diam a. Chutih lâi chuan Isua chu lalah siam a ni thuai dâwn niin mîten an lo sawi vê reng bawk. Chumi chuan a lungngaihna chu lâwmnaah a chantîr a, a LALPA chawimâwi hmasa bertu nih duhna lian tak a nei ta a ni. Tichuan, a hriak rimmtui bâwm chu a sawh keh a, Isua lû-ah leh a kê-ahte chuan hriak chu a leih ta a; tichuan a thingthî a, a mittuiin a chiah huh a sam sei tak chuan Isua kête chu a hrû a.

“Hê a thil tih hi mîte hmuh loh leh hriat loha tih ngial a tum nâ-in in chhûng chu hriak rimmtui rim chuan a luah khat zo ta thuai mai sî, mi zawng zawngin a thil tih chu eng nge ni tih an hre ta vek mai a ni. . . .

“A thil tih sawisêltûte thil sawi chu a hre vek a. A chhûngril lamah chuan a khûr der der mai a. Chutianga a pawk êm avâng chuan a laizâwnnu’n a rawn hauh pawh a hlâu hlê nghê nghê. A LALPA pawhin inren lo lutukah a lo ngâi palh ang tih pawh a hlâu hlê bawk. Eng mah sawi lo va, a rûka insaseng daih a tum lâi tak chuan LALPAN, ‘Eng mah tih suh u; engah nge in tih buai ni?’ tia sawi rî chu a hre ta a. Isua khân Mari chu a zakin a rilru a mangang hlê a ni tih a hmû a. Hetiang thil a ti hi a sualte

ngaihamsak a nih tâk avânga a lâwmzia lanfirtu a ni tih pawh a hre bawk, tichuan Mari rilru pik chu a hnawh bosak ta a ni. . . . “Mari chuan Chhandamtu ruanga hnawih atâna a lei hriak rimmtui man to tak mai chu a la dam lâi ngeiin a taksaah chuan a leihbaw ta zâwk a. . . .

“Mari hian a hmangaih thiltih chu a pawimawhzia a hrethiam famkim kher lo vang. Amah rawn demtûte puhna thu pawh chhân lêt dân tûr lah a hre hek lo. Eng vânga khatih lâi khera Isua chu hriak rimmtui va hnawih ngê maw a nih tih pawh a sawifiah thei lo bawk. Thlarau Thianghlimin a tâna thil lo ruahman lâwk sâ a nei a, ani’n ti tûra a rawn hrilh chu thuâwih takin a ti mai a ni. Amah Thlarau Thianghlim pawhin a chhan eng mah a sawi bik lo bawk. Mita hmuh theih loh in rilru leh nunaah thu a sawi a, thinlung chu thil ti tûrin a chêtûr a. Chutiang chu a nih avângin a thiltih kha Thlarau Thianghlim remtihpuina thlapa ti a ni.

“Krista chuan Mari chu a thil tih awmzia a hrilh ta a, chutia a hrilhna hmang chuan Mari hnên aţanga a dawn âia tam Mari hnênah a pe lêt tihna a ni. . . . Alabasta bâwm chu tihkeh a nih vêleha in chhûng zawng zawng rimmtui rima a khat zo ta vek ang khân, Krista chu a thî ang a, a taksa chu tihkeh sawmin a awm dawn a ni; mahse thlân aţangin a lo tholeh ang a, a nun rimmtui tak chuan lei pumpui tihkhahin a la awm ve dawn a ni.”—Ellen G. White, *Chatuan Nghahfâk*, pp. 620–538.

Mari’n inngâitlâwm taka chibai bûkna thil a tih têt tham tak khân in chhûnga awm vê mi dangte ngaihah chuan sawi tlâk pawh ni hran lo khân Krista a tilâwm tlat mai. Ani chu thinlung taka amah kan biakna leh kan fakna hian a tihlim thîn. Krista chuan kan neih hlut ber leh tha ber hi a duh a, chumi lo chu thil dang eng mah—a âia tam emaw, tlêm emaw pawh a duh lo.

Ngaihtuah teh: “I ro awmna apiangah i rilru pawh a awm ang” (*Mat. 6:21*) tih thu hi eng nge ni a awmzia? Eng tiangin nge Mari thil tih hian Pathian hnêna thil kan pêka kan rilru puthmang ni tûr min hrilh le? Eng ti kawngin nge Mari’n Isua ke-a hriak

rimtui a leihbuak kha Kristan krawsa thil a tih kha a lo entîr lâwk le?

RAHBI 3-NA—A taka nunpui tûr

ZIRTÎRTÛTE PUÂL: Hê thawnthu hi chhiar la, tichuan hê thawnthu aţanga zirlâi zir tûr awmte chu in sawi ho dâwn nia.

Kum eng emaw ti kal ta khân khawpui lian vak lo pakhat chu tuilianin a hrût a, in tam tak chu dârkâr rei lo te chhûngin tuiin a chîm pil vek mai a ni. Chumi khuaa tlangvâl pakhat, Dean-a an tih chuan an thil neih chân tâte chu ţanpui a duh êm êm a. Hetianga tui a len hmâ deuh hian Dean-a hian Isua Krista chu Lal leh Chhandamtu-ah a lo pawm ve tawh a ni.

Hê tuilian hi American-hoin an ngaihhlut êm êm Lâwmthu Sawina Nî (Thanksgiving Day) an hman zawh chiaha thleng a ni a. Chhûngkaw tam tak chuan an fâte tân Krismas thilpêk tûr an lo lei hlim chauh a ni hlawm a. Chûng an thil leite leh thil dangte pawh chu tûnah chuan khuarêl chhiatna lo thleng chuan a tui chhûngah a tipil ta vek mai a ni. Dean-a lâwina kohhran chuan Red Cross office pâwnah chiah chuan ţanpui ngâite ţanpuina tûr hmun a siam a, chhawmdâwlna thil eng emaw zât an sem bawk. Chumi hmunrawn pantûte hnênah chuan thawmhnâw leh thil dangte an lo sem zêl a. Chutianga mîte mamawh an pêk zêl lâi chuan naupang tê tak tê, a nu kawr bâl tak kâra biru châih châih hi Dean-a chuan a hmû a. Chu naupang tê chuan, “En teh sâw â nu, Isuan minrawn ngaihtuah mai ang ka tih rêng kha” a ti reuh a. Kum sâwm emaw vêl a ral leh hnû-ah chhiatna thlen dânrawn endiktu chuan Dean-ate kohhrana lâwi vê mi pakhat hnênah Dean chanchin a zâwt a. Hmân nî lawka piangthar vê chauh kha tûnah chuan an kohhranah Upa min a lo ni reng tawh a ni.

A taka tih zui theih zawhnate:

❶ Dean-an thilpêk duhna rilru a pû hian a thinlung chungchâng eng nge a sawi?

- ② Thilphal taka hnâ a thawhte hian eng tin nge thlarau lama hruaitu ni tûrin a lo buatsaih?
- ③ A hmêlhriat ngâi pawh ni lo hmeichhe naupang mai thil sawi khân eng tiangin nge Dean-a kha mi dangte ãanpuina thawk phûr lehzuâl tûrin a fuih?
- ④ Mahni hmasialna nei miah lova mi dangte ãanpuina hian eng tin nge thlarau lam ãhanna leh mawhphurhna sâng zâwk chelh thei tûrin mî a buatsaih?

RAHBI 4—Boruak siam rawh

ZIRTÏRTÛTE PUÂL: Pathian hi mahni hmasialna nei miah lova mi dangte ãanpuina kawngah chuan kan entawn ber tûr a ni a. Chuvângin a hmangaihna thil tih, a bîk takin kraws-a khenbeh a nih lâi vêla thil thlengte kha nî tin ngaihtuahin kan hre reng ãhîn tûr a ni. Chutianga Pathian kan entawn chuan kan thinlung hi siam thar a lo ni ang a, Pathian mita thil hmû-in Pathian thinlungin thil kan hre ãhîn bawk dâwn a ni. Kan vêla awmte tidamtu kut kan lo ni ang a. Chutichuan, Pathian tawrhna leh lâwmna chu ãâwmpuiin khawngaih a chungah khawngaih lehzuâlnain amah ang ni tûrin siam thar kan lo ni dâwn a ni.

Tih tûrte:

- ① Mahni hmasialna nei miah lova Pathianin min hmangaihzia lanna i thinlung khawih tak takte kha—Bible a mi emaw, lehkhabu dang a mi emaw—ziak chhuak ang che.
- ② Pathian thilthlâwnpêkte ngaihtuah nâna hun hmang tûrin khawi hmunah emaw riak chhuak ang che.